



LE GOUVERNEMENT
DU GRAND-DUCHÉ DE LUXEMBOURG
Ministère de la Justice

Luxembourg, le **04 JUIN 2021**
Réf. QP-71/21

Monsieur le Ministre
aux Relations avec le Parlement
Service Central de Législation
Luxembourg

Objet : Question parlementaire n°4223 « Délits à caractère politique » du 5 mai 2021 de l'honorable
Député Marc Goergen

Monsieur le Ministre,

J'ai l'honneur de vous faire tenir en annexe la réponse commune à la question parlementaire sous
rubrique.

Veillez agréer, Monsieur le Ministre, l'expression de ma considération distinguée.

Pour la Ministre de la Justice

Claudine Konsbruck
Conseiller de Gouvernement 1^{ère} Classe

Gemeinsam Äntwert op d'parlamentaresch Fro n° 4223 vum 5. Mai 2021

vum honorabelen Deputéierten Marc GOERGEN

Et muss een am Virfeld ënnersträichen, dass et net méiglech ass, déi genee Zuelen, déi an de verschiddene Froen vum Deputéierten zitéiert gi sinn, erëmfannen.

Am Code pénal ass déi „politesch motivéiert Strofdot“ als solch nämlech net virgesinn.

Dofir ass et och onméiglech eng Recherche an den Datebanken vun der Police an dem Parquet général ze maache mam Raster „politesch motivéiert“.

D'Police féiert keng Statistiken iwwert d'Motiv vun enger Strofdot, iwwert de Moyen, wéi se begaange ginn ass, an och net iwwert d'Zort vun de Beweiser, op déi an der Enquête zrëckgegraff gëtt.

Et ass och dofir net méiglech op Base vun den aktuellen Datebanken erauszefannen wéi eng Strofdoten ausschliisslech oder deelweis an engem digitalen Kader stattfonnt hunn.

D'Datebanken konzentréieren sech effektiv op d'Strofdot ewéi se am Code pénal libelléiert ass.

Am Kader vun den Aarbechten ronderëm de neien Fichier central an der Digitalisatioun gëtt u Léisunge geschafft déi et wäerten erlaben och verbessert Statistiken ze erstellen.

D'Parqueten hu matgedeelt dass momentan eng Rei Enquêtes lafen op Base vu Plainten vun eenzelen Regierungsmemberen. D'Fakten à la Base si meeschtens Äusserunge vu Privatleit op de soziale Medien.

Wat déi eventuell rietsextrem an auslännerfeindlech Tendenzen zu Lëtzebuerg ubelaangt muss ee folgendes ënnersträichen:

Och ouni statisteschen Outil mécht d'Police d'Erfaung, dass déi lescht Joren méi Plainten betreffend Infraktiounen mat auslännerfeindlechen, respektiv rietsextreme Motiver gefouert ginn. Ob de Phänomen an der Gesellschaft méi grouss ginn ass, léisst sech doraus awer net schléissen, well et och ka sinn, dass d'Plainteverhalen vum Bierger geännert huet (z.Bsp. well ee vereinfacht iwwert verschidde Plattformen wéi „Bee Secure“ Situatiounen denoncéiere kann).

Säit 2020 ass zu Lëtzebuerg d'Lutte géint gewaltbereeten Extremismus gekennzeechent duerch eng méi grouss Opmierksamkeet op de gewaltbereeten Rietsextremismus. Dësen ass net noutgedrungen un e präzise Mouvement oder eng Organisatioun ze bannen, mä charakteriséiert sech éischer duerch eng zouhuelend Fragmentéierung vun de Milieuen an

enger Diversifizierung vun den Ideologien op deene se fousen. Eng net ze ënnerschätzend Roll spillen an deem Kader Desinformatiounscampagnen an dat geziilt Verbreede vu Falschinformationen, virun allem op de sozialen Netzwierker.

D'Gefor déi vum gewaltbereeten Extremismus ausgeet, ass net ze ënnerschätzen. Eng Rei vun europäesche Länner konnte schon eng Zounam vun extremisteschen Tendenzen am Laf vun der Coronapandemie feststellen an d'Regierung kann net ausschléissen, datt dës och zu Lëtzebuerg an Zukunft kéinten zouhuelen.

Wéi am Artikel (3) vum ofgeännerten Gesetz vum Service de Renseignement vum 5. Juli 2016 definéiert, ass den SRE zoustänneg fir d'Präventioun vu Geforen am Kader vum Terrorismus a gewaltbereeten Extremismus. Zu Präventiounszwecker sammelt den SRE Informatiounen iwwert Bedrohungen am Zesammenhang mam Terrorismus an gewaltbereeten Extremismus déi et sollen erméiglechen, eng fundéiert Bewäertung vun der Sëchersituatioun ze maachen.

Op nationalem Niveau schafft den SRE an dësem Kader och regelméisseg mat de Justizautoritéiten a mat de Servicer vun der Groussherzoglecher Police zesummen.

Et ass eng positiv Charakteristik vum Internet, datt d'NotzerInnen d'Méiglechkeet hunn, hier Meenung – och politescher Natur aus sämtleche Spektren - fräi kënnen Präis ze ginn. Dëst bréngt fir d'NotzerInnen mat sech, datt ee méi wi je d'Kompetenze brauch fir Informatiounen, Meenungen, Donnéeën an digital Inhalter kënnen ze analyséieren an ze vergläichen. Dës Kompetenz ass eng vun deenen, déi opgelëscht sinn am Medienkompass fir d'Education aux et par les médias, deem 2020 vum MENJE agefouert gouf.

BEE SECURE, eng Initiativ, déi änlech schafft wéi et Klicksafe.de an Däitschland mécht, huet déi lescht Joren eng Rei Aktiounen lancéiert fir de Kanner a Jonken zu Lëtzebuerg ze weisen, wéi ee ka méi kritesch mat (politeschen) Informatiounen am Internet ëmgoen. Vun Oktober 2019 bis Februar 2021 huet BEE SECURE 450 Sensibiliséierungsformatiounen iwwert Desinformatioun a Lycée a 5 Formations continues ofgehalen. Parallel derzou ass am Schouljoer 2019/20 eng öffentlech Kommunikatiounscampagne iwwer Desinformatioun gelaf.

Niewt BEE SECURE huet den Zentrum fir politesch Bildung (ZpB) verschidden Angeboter fir ze sensibiliséieren, respektiv déi präventiv wierken. Dorënner sinn eng Ausstellung "State of Deception" (Thema Propaganda an Antisemitismus), déi vum ZpB gratis zur Verfügung gestallt gëtt.; en online Tool "Propaganda.guide", den hëlleft tëscht (politescher) Propaganda an Informatioun ze ënnerscheeden an den online Tool "Filterbubble.lu", den de Notzer vum Internet weise kann, wéi déif een an enger Informatiounsbloos stécht a wat ee muss maachen, fir aus der "Filterblase" erauszekommen.

Do wou Meenungen ufänken, d'Fräiheeten an d'Rechter vun anere Persounen ze verletzen, hält d' Meenungsfräiheet op (454-457-4 vum Code Pénal). Dëst gëllt och fir den Internet. Mat der BEE SECURE Stopline gëtt et zu Lëtzebuerg e Service, deem hei aktiv gëtt. D'Biergerinnen hunn d'Méiglechkeet iwwert déi Plattform illegal Inhalter um Internet ze mellen. Heirënner falen och Rassismus, Revisionismus, aner diskriminéierend

Inhalter souwéi Terrorismus. Inhalter gi, falls noutwendeg, un déi zoustänneg Instanze weidergeleet, d.h. un d'Police Grand-Ducale, déi dann déi nächst Schrëtt aleeden.

D'Zuele vu gemellten Inhalter an de leschte 6 Joer aus dem Beräich Rassismus, Revisionismus an aner diskriminéierend Inhalter:

2018: 122 Meldunge kritt, dervunner 68 weidergeleet.

2019: 219 Meldunge kritt, dervunner 152 weidergeleet.

2020: 292 Meldunge kritt, dervunner 240 weidergeleet.

Am Beräich Terrorismus (Art. 327-331 vum Code Pénal) goufen et di lescht 3 Joer folgend Meldungen:

2018: 9 Meldunge kritt, dervunner 3 weidergeleet.

2019: 11 Meldunge kritt, dervunner 6 weidergeleet.

2020: 22 Meldunge kritt, dervunner 15 weidergeleet.

Aktuell mécht d'BEE SECURE Stopline keng detailléiert Glidderung vun de Meldungen, dohier ass et net méiglech ze soen, wéi vill Meldungen e rietsextremen Hannergrond hunn.